

Rā 3, Ko te Haerenga Mai – Rātū/Tūrei i te ata

He Karakia mō ngā Rātū/Tūrei o te "Wā noa iho", o ia rā rānei o te wā o te Haerenga Mai

Ka whakapuakina anō te korōria o Ihowā, a ka kite ngātahi ngā kikokiko katoa.

Ihāia 40.5

Kia horo te tata mai, e Īhu te Ariki
Tū waenganui i a mātou i te rā nei
Hei whakatau, hei pōwhiri i a mātou
Kia ū mātou, kia noho tahi
Kia rongo ai i te mahamatanga
I te hari koa, o te nohoanga tahitanga
O te teina tuakana i raro i te whakaaro kotahi. **Āmine.**

Te Kupu a te Atua

Ētahi o ēnei Waiata a Rāwiri, ko rātou e whakarite ana i te Maramataka o te tau rānei, ā, ka mutu ia waiata, ia waiata, i ngā rā katoa o te tau, nā, ko tēnei, Korōria ki . . .

Te Wiki tuatahi, me ngā Rātapu o te Haerenga Mai – Waiata 24

- 1 Nō Ihowā te whenua, me ūna tini mea, •
te ao, me ngā tāngata e noho ana i runga.
- 2 He mea whakatū hoki nāna ki runga ki ngā moana, •
he mea whakaū ki runga ki ngā roma.
- 3 Ko wai e eke ki te maunga o Ihowā? •
Ko wai e tū ki tōna wāhi tapu?
- 4 Ko te tangata he mā nei ngā ringa, he harakore tōna ngākau, •
kāhore nei i ara tōna wairua ki te horihori, ā, kāhore i oati teka.
- 5 Ka riro i a ia te manaaki a Ihowā, •
me te tika a te Atua o tōna whakaoranga.
- 6 Ko te whakatupuranga tēnei o te hunga e rapu ana ki a ia, •
e rapu nei i tōu mata, e Hākopa.
- 7 Kia ara ū koutou mātenga, e ngā tatau, •
ara ake, e ngā tatau onamata; ā, ka tomo te Kīngi o te korōria.
- 8 Ko wai tēnei Kīngi korōria? •
Ko Ihowā, ko te kaha, ko te mārohirohi,

- ko Ihowā, ko te mārohirohi ki te whawhai.
- 9 Kia ara ō koutou mātenga, e ngā tatau, kia ara ake, e ngā tatau onamata, •
ā, ka tomo te Kīngi o te korōria.
- 10 Ko wai tēnei Kīngi korōria? •
Ko Ihowā o ngā mano, ko ia te Kīngi korōria.

Te Wiki tuarua, me ngā Rāhina/Mane o te Haerenga Mai, Waiata 75

- 1 Ka whakawhetai tonu mātou ki a koe, e te Atua,
ka whakawhetai tonu mātou;
kei te tata mai hoki tōu ingoa: •
e kōrerotia ana e te tangata āu mahi whakamīharo.
- 2 “Ka kitea e ahau te wā e rite ana, •
ka tika tāku whakawā.
- 3 Kūteretere noa iho te whenua me ūna tāngata katoa; •
nāku i whakatū ūna pou.
- 4 I mea ahau ki te hunga whakakake, ‘Kāti rā te whakakake;’ •
ki te hunga hara anō, ‘Kaua e whakaarahia te haona.
- 5 Kaua tō koutou haona e whakaarahia ki runga: •
kāti te whakamārō i te kakī ina kōrero.’ ”
- 6 Nō te mea kāhore he aranga i te rāwhiti, •
kāhore i te hauāuru, kāhore hoki i te tonga.
- 7 Ko te Atua ia te kaiwhakawā; •
ko tēnei e whakaititia iho ana e ia, ko tērā e whakaarahia ake ana.
- 8 Kei te ringa hoki o Ihowā he kapu, pāhuka tonu te wāina;
kī tonu, whakananu rawa, hei ringihanga māna: •
ko ngā nganga ia, mā te hunga kino katoa o te whenua e tatau, e inu.
- 9 Ko ahau ia, ka kauwhau tonu: •
ka hīmene ki te Atua o Hākopa.
- 10 Ā, ka kotia e ahau ngā haona katoa o te hunga kino: •
ka whakaarahia ake ia ngā haona o te tangata tika.

Te Wiki tuatoru, me ngā Rātū/Tūrei o te Haerenga Mai, Waiata 25

- 1 Ka ara nei tōku wairua ki a koe, •
e Ihowā.
- 2 E tōku Atua, ko koe tōku whakawhirinakitanga; •
kei whakamā ahau, aua ūku hoariri e tukua kia whakaputa ki ahau.
- 3 Āe, aua tētahi o te hunga e tatari ana ki a koe e tukua kia whakamā; •
kia whakamā te hunga e tinihanga noa ana.

- 4 Whakakitea ki ahau āu ara, e Ihowā; •
whakaakona ahau ki āu huarahi.
- 5 Ārahina ahau i tōu pono, whakaakona hoki ahau; •
ko koe hoki te Atua o tōku whakaoranga;
pau noa te rā i ahau e tatari nei ki a koe.
- 6 E Ihowā, kia mahara ki āu mahi tohu, ki āu mahi aroha; •
nōnamata riro hoki ēnā.
- 7 Kaua e maharatia ngā hara o tōku tamarikitanga, me ūku kino; •
mahara mai koe ki ahau, e Ihowā, kia rite ki tāu mahi tohu,
kia whakaaro ki tōu pai.
- 8 He pai, he tika a Ihowā, •
ā, ka whakaakona e ia te hunga hara ki te huarahi.
- 9 Ka ārahina e ia te hunga māhaki i runga i te whakawā; •
ka ākona hoki e ia te hunga māhaki ki tāna ara.
- 10 He mahi tohu, he pono ngā ara katoa o Ihowā
ki te hunga e pupuri ana i tāna kawenata, •
i āna whakaaturanga.
- 11 Kia mahara ki tōu ingoa, e Ihowā, •
ā, murua tōku kino, he nui nei hoki.
- 12 Ko wai te tangata e wehi ana ki a Ihowā? •
Ka whakaako ia i a ia ki te ara e pai ai ia.
- 13 Ka noho tōna wairua i runga i te pai, •
ā, ka riro te whenua i tōna uri.
- 14 Kei te hunga e wehi ana i a ia te mea ngaro a Ihowā; •
ā, māna e whakakite ki a rātou tāna kawenata.
- 15 E tau tonu ana ūku kanohi ki a Ihowā; •
māna hoki e unu ake ūku waewae i te kupenga.
- 16 Tahuri mai ki ahau, tohungia hoki ahau; •
he mokemoke hoki ahau, e mamae ana te ngākau.
- 17 Kua whakanuia ngā whakapāwera o tōku ngākau; •
whakaputaina ahau i roto i ngā mea e pēhi nei i ahau.
- 18 Tirohia tōku mate me tōku mamae, •
ā, murua katoatia ūku hara.
- 19 Tirohia mai ūku hoariri, he tokomaha hoki rātou: •
ā, he nanakia te kino e kino nei rātou ki ahau.
- 20 Tiakina tōku wairua, ā, whakaorangia ahau; •
kei whakamā ahau; e whakawhirinaki ana hoki ahau ki a koe.
- 21 Tukua mā te ngākau tapatahi, mā te tika ahau e tiaki; •

e tūmanako ana hoki ahau ki a koe.
22 Hokona, e te Atua, ā, Īharaira •
i roto i ūna whakapāwera katoa.

Te Wiki tuawhā, me ngā Rāapa/Wenerei o te Haerenga Mai, Waiata 28

- 1 Ka karanga ahau ki a koe, e Ihowā, e tōku kōhatu,
kaua e wahangū ki ahau; •
ki te wahangū hoki koe ki ahau,
ka rite ahau ki te hunga e heke atu ana ki te poka.
- 2 Whakarongo ki tōku reo īnoi, ua karanga ahau ki a koe, •
ina totoro ūku ringa ki tōu ahurewa tapu.
- 3 Kaua ahau e kūmea tahitia me te hunga hē; •
me ngā kaimahi i te kino, he mārie ā rātou kupu ki ū rātou hoa,
he kino ia kei roto i ū rātou ngākau.
- 4 Kia rite ki ā rātou mahi tāu e hoatu ai ki a rātou,
ki te kino anō o ā rātou hanga; •
kia rite ki ngā mahi a ū rātou ringa tāu e hoatu ai ki a rātou,
whakahokia tā rātou utu ki a rātou.
- 5 Nā, kāhore nei rātou e whakaaro ki ngā mahi a Ihowā,
ki ngā meatanga a ūna ringa, •
mō reira ka whakahoroa iho rātou e ia, e kore anō e whakatūria ake.
- 6 Kia whakapaingia a Ihowā •
mōna i whakarongo mai ki tōku reo īnoi.
- 7 Ko Ihowā tōku kaha, tōku whakangungu rākau;
i whakawhirinaki tōku ngākau ki a ia, •
ā, āwhinatia ana ahau; koia i hari ai tōku ngākau,
i whakamoemiti ai hoki tāku waiata ki a ia.
- 8 Ko Ihowā tō rātou kaha, •
ko ia anō te kaha whakaora o tāna tangata i whakawahi ai.
- 9 Whakaorangia tāu iwi, manaakitia tōu kāinga tupu; •
whāngaita rātou, whakaarahia ake ake.

Te Wiki tuarima, me ngā Rāpare/Tāite o te Haerenga Mai, nā Waiata 62

- 1 Ko te Atua anake tāku e tatari nei; •
kei a ia te whakaoranga mōku.
- 2 Ko ia anake tōku kōhatu, tōku whakaoranga, tōku pā hoki, •
e kore e nui tōku ngāueuetanga.
- 5 Tatari, e tōku wairua, ki te Atua anake; •

- ko ia tāku e tūmanako nei.
- 6 Ko ia anake tōku kōhatu, tōku whakaoranga, tōku pā hoki; •
e Kore ahau e whakangāueuetia.
- 7 Kei te Atua te whakaoranga mōku, te korōria anō mōku; •
kei te Atua te kōhatu o tōku kaha, tōku piringa.
- 8 Whakawhirinaki ki a ia i ngā wā katoa, e te iwi, noa ngā rangatira; •
ki te pāunatia rātou, māmā noa ake rātou tahi i te horihori.
- 10 Kaua e whakawhirinaki ki te tūkino, kei wairangi hoki ki te pāhua; •
ki te tini haere ngā taonga, kei whakamanawa tō koutou ngākau ki reira.
- 11 Kotahi kōrerotanga a te Atua, •
ka rua ūku rongonga i tēnei, nō te Atua te kaha.
- 12 Nāu anō, e te Ariki, te mahi tohu; •
rite tonu hoki ki tāna mahi tāu utu ki te tangata.

Te Wiki tuaono, me ngā Rāmere/Paraire o te Haerenga Mai, Waiata 40

- 1 I tatari mārie ahau ki a Ihōwā; •
ā, anga ana ia ki ahau, whakarongo ana ki tāku karanga.
- 2 Nā, kei te tango ake ia i ahau i te poka whakamataku, i te paru tāoruoru; •
kei te whakatū i ūku waewae ki runga ki te kōhatu,
kei te whakaū i ūku hīkoinga.
- 3 Ā, hōmai ana e ia he waiata hou ki tōku māngai, he whakamoemiti
ki tō tātou Atua. •
He tokomaha e kite, ā, ka wehi ka whakawhirinaki ki a Ihōwā.
- 4 Ka hari te tangata kua waiho nei e ia a Ihōwā
hei whakawhirinakitanga mōna; •
ā, kāhore e tahuri ki te hunga whakakake,
ki te hunga hoki e peka ana ki te teka.
- 5 E Ihōwā, e tōku Atua, he tini āu mahi whakamīharo i mahia e koe,
me ūwhakaaro ki a mātou;
e Kore e taea te kōrero whakatepe atu ki a koe; •
me i mea ahau kia whakakitea, kia kōrerotia, e Kore e taea te tatau.
- 6 Kīhai i matenuitia e koe te patunga tapu, me te whakahere; pokaia ana
e koe ūku taringa. •
Kīhai koe i mea mai ki te tahunga tinana, ki te whakahere hara.
- 7 Nā, ko tāku meatanga atu, “Nā, kua tae mai ahau; •
kei roto i te pukapuka te tuhituhi mōku.
- 8 Ko taku pai ko te mea i tāu e pai ai, e tōku Atua; •
āe rā, kei tōku ngākau tāu ture.”

- 9 Kua kauwhautia e ahau te tika i roto i te whakaminenga nui; •
nanā, kīhai i kopia ūku ngutu, tēnā koe te mātau ana, e Ihowā.
- 10 Kīhai i hunā e ahau tōu tika i roto i tōku ngākau;
kua kōrerotia e ahau tōu pono me tāu whakaoranga; •
kīhai i hunā e ahau tōu aroha me tōu pono i te whakaminenga nui.
- 11 Kei kaiponuhia tōu aroha ki ahau, e Ihowā; •
mā tōu atawhai me tōu pono ahau e tiaki i ngā wā katoa.
- 12 Tā te mea kua karapotia ahau e ngā kino e kore e taea te tatau;
mau pū ahau i ūku kino, tē āhei te titiro ake; •
he tini kē i ngā makawe o tōku mātenga; ā, hemo iho tōku ngākau.
- 13 Kia pai, e Ihowā, ki te whakaora i ahau; •
e Ihowā, hohoro ki te āwhina i ahau.
- 14 Kia whakamā, kia pororaru ngātahi te hunga e rapu ana i tōku wairua
kia whakamatea; •
kia whakahokia ki muri, kia whakamā te hunga e hiahia ana kia hē ahau.
- 15 Kia hunā, hei utu mō tō rātou whakamā, •
te hunga e mea mai ana ki ahau, "Ha, ha!"
- 16 Kia hari, kia koa ki a koe te hunga katoa e rapu ana i a koe; •
kia mea tonu te hunga e pai ana ki tāu whakaoranga,
"Kia whakanuia a Ihowā."
- 17 Ko ahau ia, he iti, he rawakore; heoi, e whakaaro ana te Ariki ki ahau. •
Ko koe tōku āwhina, tōku kaiwhakaora; kaua rā e whakaroa, e tōku Atua.

Te Wiki tuawhitu, me ngā Rāhoroi/Hatarei o te Haerenga Mai – Waiata 146

- 1 Whakamoemititia a Ihowā! •
E tōku wairua, whakamoemititia a Ihowā!
- 2 I ahau e ora nei ka whakamoemiti ahau ki a Ihowā; •
ka hīmene ahau ki tōku Atua i ahau i te ao nei.
- 3 Kei whakawhirinaki ki ngā rangatira, ki te tama rānei a te tangata, •
kāhore nei he āwhina.
- 4 Ko te putanga atu o tōna wairua, hoki ana ia ki tōna oneone; •
kore iho ūna whakaaro i taua rā pū anō.
- 5 Ka hari te tangata ko te Atua nei o Hākopa tōna kaiāwhina; •
ko tāna e tūmanako ai ko Ihowā, ko tōna Atua;
- 6 ko te kaihanga o te rangi, o te whenua, o te moana,
o ngā mea katoa o reira; •
e pupuri nei i te pono ake ake;
- 7 e tohe nei i te whakawā a te hunga e tūkinotia ana; •

e whāngai nei i te hunga mate hiakai. Ko Ihowā hei wewete i ngā herehere; 8 ko Ihowā hei whakatitiro i ngā matapō. •

Ko Ihowā hei whakaara i te hunga kua whakapikoa iho;
e aroha ana a Ihowā ki te hunga tika.

9 Ko Ihowā hei tiaki i ngā manene; ko ia hei tautoko i te pani, i te pouaru; •
ko te ara ia o te hunga kino, ka huripokitia e ia.

10 Ko Ihowā hei kīngi ake ake, āe, ko tōu Atua, e Hiona, •
tae noa ki ngā whakatupuranga katoa. Whakamoemtitia a Ihowā!

*Waiata Whakamoemiti nā te Kawenata Hou
ko tēnei*

Waiata Whakamoemiti tuatahi

1 "He nui āu mahi, e mīharotia ana, e te Ariki, e te Atua Kaha Rawa! •
Tika tonu ū ara, pono tonu, e te Kīngi o ngā whakatupuranga!

2 Ko wai e kore e wehi i a koe, e te Ariki?
E kore hoki e whakakorōria i tōu ingoa? •

Ko koe anake hoki te tapu ana;

3 Ka haere mai hoki ngā tauiwi katoa, ka koropiko ki tōu aroaro; •
kua whakakitea hoki āu tikanga tika."

4 "Waiho atu i tēnei e noho nei i runga i te torōna, i te Reme hoki, •
te whakapai, te hōnore, te korōria, te kaha ā ake ake!"

Ngā Whakakitenga 15.3b, 4; 5.13

ko tēnei rānei

Waiata Whakamoemiti tuarua

1 Kua tae nei tātou ki Maunga Hiona, •
ki te pā o te Atua ora, ki Hiruhārama i te rangi,

2 ki ngā mano tini o ngā anahera, ki te huihui nui, •
ki te hāhi o ngā mātāmua, kua oti te tuhituhi ki te rangi,

3 ki te Atua hoki, ki te kaiwhakawā o ngā tāngata katoa,
ki ngā wairua anō o te hunga tika kua oti te mea kia tino tika, •

ki a Īhu anō hoki, ki te takawaenga o te kawenata hou,

4 Nā, ka riro nei i a tātou he kīngitanga •
e kore e taea te whakangāueue,

5 kia whiwhi tātou ki te aroha noa e manakohia mai ai tā tātou e mahi nei •
ki te Atua i runga i te hopohopo, i te wehi;

6 he ahi hoki e kai ana tō tātou Atua.

Hiperu 12.22–24, 28, 29

Korōria ki . . .

Ngā Pānui Karaipiture

ko tētahi o ēnei pānui, ko tētahi nō te Maramataka o te tau rānei

Te Wiki tuatahi, me ngā Rātapu o te Haerenga Mai

Kātahi a Ihowā ka mea ki a Kaina, “Kei hea a Āpera tōu teina?” Ka mea ia, “Kāhore ahau e mōhio. Ko ahau ianei te kaitiaki o tōku teina?” Nā, ka mea ia, “He mahi aha tēnei āu? E tangi mai ana te reo o te toto o tōu teina ki ahau i roto i te whenua. Nā, ka kangā koe i runga i te whenua, i hāmama nei tōna waha hei rerenga atu mō te toto o tōu teina i whakahekeā nei e tōu ringa.”

Kenehi 4.9–11

Te Wiki tuarua, me ngā Rāhina/Mane o te Haerenga Mai

Tēnei anō hoki tētahi, e mōhio ana tātou ki te tāima, kua taka noa ake tēnei te wā e ara ake ai koutou i te moe. Kua tata kē hoki ināianei tō tātou whakaoranga i tō te wā i whakapono tuatahi ai tātou. Kua aua atu te pō, ka tata te ao. Mō konei rā kia whakarērea e tātou ngā mahi o te pōuri, kia kākahuria iho ngā kākahu whawhai o te mārama. Engari, kākahuria iho te Ariki, a Īhu Karaiti, kaua hoki e whakaaroa wawetia te kikokiko kia mahia ko ūna hiahia.

Rōma 13.11–12, 14

Te Wiki tuatoru, me ngā Rātū/Tūrei o te Haerenga Mai

Ā muri iho, ka haere a Mohi rāua ko Ārona, ka kōrero ki a Parao, “Ko te kupu tēnei a Ihowā, a te Atua o Īharaira, ‘Tukua tāku iwi kia haere ki te taka hākari ki ahau i te koraha.’” Nā, ka mea a Parao, “Ko wai a Ihowā kia rongo ahau ki tōna reo, kia tukua a Īharaira? Kāhore ahau e mōhio ki a Ihowā, e kore hoki e tukua atu e ahau a Īharaira.”

Ekoruhe 5.1–2

Te Wiki tuawhā, me ngā Rāapa/Wenerei o te Haerenga Mai

Ka mea a Mohi, “Kia mahara hoki ki te ara katoa i ārahi ai a Ihowā, tōu Atua, i a koe i te koraha, i ēnei tau e whā tekau, kia iro ai koe, hei whakamātautau hoki i a koe, kia mōhiotia ai ngā aha noa i roto i tōu ngākau, ka pupuri rānei koe i āna whakahau, kāhore rānei. Ā, whakawhiua ana koe e ia, whakamatea ana ki te kai, whāngaia ana ki te mana, kīhai nei i mōhiotia e koe, kīhai anō i mōhiotia e ūmātua; kia whakamōhio ai ia i a koe e kore te tangata e ora i te

taro kau, engari, mā ngā kupu katoa e puta mai ana i te māngai o Ihowā ka ora ai te tangata.”

Tiuteronomi 8.2–3

Te Wiki tuarima, me ngā Rāpare/Tāite o te Haerenga Mai

Mō konei kia mau ki ngā mea whawhai katoa a te Atua, kia taea ai e koutou te tū atu ki te riri i te rā kino, ā, ka poto i a koutou ngā mea katoa te mahi, kia tū. E tū rā, he mea whītiki ō koutou hope ki te pono, kākahuria iho anō hoki ko te tika hei pukupuku; herea iho te rongopai o te rangimārie hei hū mō ō koutou waewae, kia takatū ai. Mō waho i ēnei mea katoa e mau ki te whakapono hei whakangungu rākau, e taea ai e koutou te tinei ngā mātia muramura katoa a te wairua kino. E mau hoki ki te ora hei pōtae, ki te hoari hoki a te Wairua, arā ki te kupu a te Atua. Kia pau te īnoi me te tohe, me īnoi i ngā wā katoa i roto i te Wairua.

Epeha 6.13–18a

Te Wiki tuaono, me ngā Rāmere/Paraire o te Haerenga Mai

Kia ngohengohe anō hoki, koutou katoa, tētahi ki tētahi, ko te ngākau pāpaku anō hei whītiki mō koutou; nō te mea hoki, “E pakeke ana te Atua ki te hunga whakapehapeha, ka hoatu ia e ia he aroha noa ki te hunga pāpaku.” Nā, whakapāpaku iho koutou i raro i te ringaringa kaha o te Atua, kia whakateiteitia ake ai koutou e ia i te wā e pai ai. Makā atu ō koutou mānukanuka katoa ki runga ki a ia; e whakaaro ana hoki ia ki a koutou.

1 Pita 5.5b–7

Te Wiki tuawhitu, me ngā Rāhoroi/Hatarei o te Haerenga Mai

Nā, haere ana a Irāia ki tētahi ana, ā, moe ana i reira. Nā, ka puta mai te kupu a Ihowā ki a ia; i mea ia: “E aha ana koe i konei, e Irāia?” Ā, ka mea tērā, “Nui atu tōku hae mō Ihowā, mō te Atua o ngā mano; kua whakarērea hoki tāu kawenata e ngā tama a Īharaira, ā, ko āu āta, wāhia iho e rātou, patua iho hoki e rātou āu poropiti ki te hoari. Ā, ko ahau, ko ahau rawa anake i mahue; ā, kei te rapu rātou i ahau kia whakamatea.” Nā, ka mea ia, “Puta mai, ka tū ki te maunga ki te aroaro o Ihowā.” Nā, ko te haerenga atu o Ihowā, he nui anō te hau, he kaha, e whakakōara ana i ngā maunga, e wāhi ana i ngā kōhatu i te aroaro o Ihowā. Otiia, kāhore a Ihowā i roto i te hau; ā muri iho i te hau ko te rū; otiia, kāhore a Ihowā i roto i te rū. Ā, i muri o te rū ko te ahi; otiia kāhore a Ihowā i roto i te ahi; ā, i muri i te ahi ko te reo ngāwari, he mea

iti. Ā, nō te rongonga o Irāia ka hīpokina e ia tōna mata ki tōna koroka, ā, haere ana, tū ana i te kūwaha o te ana.

1 Ngā Kīngi 19.9–13a

Te Waiata a Hakaraia

Kīnga mō ngā rā noa iho

I puta mai te pūaotanga o runga ki a tātou, •
hei whakamārama i te hunga e noho ana i te pōuri.

Kīnga mō ngā rā i te Haerenga Mai ki te 16 o Tihema, rānei

Hiruhārama, titiro ki te rāwhiti, •
kia kite i te koa e puta mai ana i te Atua ki a koe.

Kīnga mō ngā rā mai i te 17 o Tihema ki te pō i mua tata i te Ra Whanau, rānei

E rite ana i te whitinga o te rā i te ata,
i puta mai i te pūaotanga te Kaiwhakaora o te ao; •
e rite ana i te hekenga o te ua i runga i ngā tarutaru pai,
ka heke iho e te Karaiti ki runga i a tātou.

Kīnga mō ngā Tāngata wairua

Tēnā ko te hunga e tatari ana ki a te Atua; •
kake ana rātou ki runga i ngā parirau, i rite ana ki ngā kāhu.

Kia whakapaingia te Ariki, te Atua o Īharaira: •
kua titiro mai hoki ia, kua hoko i tāna iwi.

Kua whakaarahia ake e ia he haona whakaora mō tātou: •
i roto i te whare o Rāwiri, o tāna pononga.

Ko tāna hoki ia i kōrerotia e te māngai o āna poropiti tapu: •
nō te tīmatanga iho anō o te ao:

Hei whakaora i a tātou i ō tātou hoa whawhai: •
i te ringa anō o te hunga katoa e kino ana ki a tātou;

Hei whakaputa i te mahi tohu ki ō tātou tūpuna: •
hei whakamahara ki tāna kawenata tapu;

Ki te oatī i oatī ai ia ki a Āperahama: •
ki tō tātou tupuna.

Kia tukua mai e ia ki a tātou he ora i te ringa o ō tātou hoa whawhai: •
kia mahi wehikore tātou ki a ia,

I runga i te tapu, i te tika, ki tōna aroaro: •
i ngā rā katoa e ora ai tātou.

Ā, ko koe, e tama, ka kīia ko te poropiti a te Runga rawa: •
e haere hoki koe i te aroaro o te Ariki, hei whakapai i ūna ara;

Hei whakamātau i tāna iwi ki te ora: •
i ō rātou hara e murua ana;
He mea hoki nā te aroha, nā te mahi tohu a tō tātou Atua: •
nā reira hoki i puta mai ai te pūaotanga o runga ki a tātou,
Hei whakamārama i te hunga e noho ana i te pōuri, i te ātārangi hoki o te
mate: •
hei whakatika i ō tātou waewae ki te huarahi o te rangimārie.

Ruka 1.68–79

Kia whakakorōriatia te Matua, te Tama: •
me te Wairua Tapu;
ko te ritenga ia i te tīmatanga, ā tēnei anō ināianei: •
ā ka mau tonu iho, ā ake ake. Āmine.

ko tēnei rānei

Korōria ki te Matua, ki te Tama,
ki te Wairua Tapu; •
mai i te tīmatanga, ki tēnei wā,
ā, haere ake nei. Āmine.

Kīanga anō

Ngā Īnoi

Ngā īnoi takawaenga me ngā whakawhetai

E te Ariki, kia aroha mai.
E te Karaiti, kia aroha mai.
E te Ariki, kia aroha mai.

Te īnoi mō te rā, te īnoi mō te Rātū/Tūrei, te īnoi mō te Haerenga Mai rānei

Te īnoi mō te Rātū/Tūrei

E te Atua o te tūmanako,
kia puta mai tāu Tama te Karaiti
aua ia e kite i a mātou e moe ana, e māngere ana,
engari e mahi ana ki a ia, ā e rite ana.
Āmine.

Te īnoi mō te Haerenga Mai

E te Atua kaha rawa,
hōmai he aroha noa kia wetekia e mātou ngā mahi o te kino,
kia whakamaua hoki ki ngā pūeru o te māramatanga

ināianei i tēnei ao matemate,
i haere pāpaku mai ai tāu Tama a Īhu Karaiti;
ā te wā e haere mai anō ia i runga i tōna rangatiratanga tino ātaahua
kia ara ake ai mātou ki te oranga tonutanga;
ko ia e ora ana, e kīngi tahi ana, me koe
me te Wairua Tapu,
kotahi anō Atua, āianei ā ake tonu atu.
Āmine.

Te īnoi a te Ariki

E tatari ana mō te taenga mai o te rangatiratanga o te Atua, ā,
kua akona nei tātou e tō tātou Ariki, ka īnoi tātou.

E tō mātou Matua i te rangi

Kia tapu tōu Ingoa.

Kia tae mai tōu rangatiratanga.

Kia meatia tāu e pai ai

ki runga ki te whenua,

kia rite anō ki tō te rangi.

Hōmai ki a mātou āianei

he taro mā mātou mō tēnei rā.

Murua ū mātou hara,

Me mātou hoki e muru nei

i ū te hunga e hara ana ki a mātou.

Aua hoki mātou e kawea kia whakawaia;

Ēngari whakaorangia mātou i te kino:

Nōu hoki te rangatiratanga, te kaha,

me te korōria,

Ake ake ake. Āmine.

Te manaakitanga

Mā te Atua o te tūmanako,

e whakaū ū tātou ngākau

ki te koa, ki te rangimārie

kia pono ai tātou,

i runga i te ihi, i te mana,

o te Wairua Tapu. Āmine.

I te wā o te Haerenga Mai, ko tēnei rānei:

Mō te taenga mai o te Karaiti kei te mataara kei te tatari tātau. Āmine.

Kia whakapaingia te Ariki.

Ki te Atua ia te whakawhetai.